



TRNOVO

Informativni bilten Općine Trnovo

Mart, 2018.



opcina.trnovo@bih.net.ba



www.trnovo.ba



STEĆAK

Stećak mramorni ćuti govorom scena po boku,
jači od kandža kiše, povampirenja i krađe.
Njegov mjesec i sunce, što znače posmrtna lađa,
davno su prevezli dušu, vjekuju sad u doku.

Udaljili su se od njega i gradovi i sela.
Vidik mu stvore listopad i koze što tu brste.
Vjetar podsjeti lijeske, i one se šaptom krste.
Zmija mu krene uz reljef, svoj reljef svoje sred čela.

Zašto sam došao ovdje, kad sve već ovdje piše?
Posljednju blijedu zelen s jesenjom travom dišem.
Čuj, zvoni zrelo stablo - to lijes mi teše žuna.

Stihove što još bruje dlijetom po stećku svom stišaj,
pa, uspokojen, pusti neka ih pokrije lišaj,
lezi pod stećak stiha bez prevoznika-čuna.

Skender Kulenović



SADRŽAJ

Infrastrukturni projekti Općine Trnovo	4
Bjelašnica	11
EYOF 2019	14
Općinsko vijeće Trnovo	15
Poslovno - sportski centar Trnovo	16
Radne posjete	18
Privreda	19
Obilježavanje značajnih datuma	21
Sigurnost stanovnika općine	24
Naša djeca - naša budućnost	25
Društvena odgovornost	27
Žene u politici	28
Život	30

IMPRESSUM

Izdavač: Općina Trnovo
 Godina izdanja: 2018.g.
 Urednik: Ajla Mulaosmanović
 Bajro Lindov
 DTP: Haris Pindžo
 Štampa: TMP Društvo za zapošljavanje slijepih
 i slabovidnih lica - d.o.o Sarajevo



KONTAKT PODACI

Trnovo 36, 71223 Delijaš
 telefon 033/586-700
 fax 033/586-705
 opcina.trnovo@bih.net.ba
www.trnovo.ba

Ostali kontakt telefoni:
 Općinsko vijeće
 033/586-710

Kabinet Općinskog načelnika
 033/586-704

Sekretar organa uprave
 033/586-707

Pomoćnici Općinskog načelnika
 033/586-712

Služba za opću upravu, društvene djelatnosti,
 boračko - invalidsku, dječiju i socijalnu zaštitu
 033/586-703

Služba za civilnu zaštitu i inspeksijske poslove
 033/586-701

Služba za geodetske, imovinsko – pravne poslove i
 katastar nekretnina
 033/586-713

Služba za urbanizam, komunalne poslove,
 investicije i zaštitu čovjekove okoline
 033/586-714

Služba za privredu, finansije i lokalni ekonomski
 razvoj
 033/586-708 i 033/586-709

Matična i protokol
 033/586-702

Pravobranilaštvo Općine Trnovo
 033/586-730

INFRASTRUKTURNI PROJEKTI OPĆINE

U okviru Programa naplate i usmjeravanja sredstava u 2017. godini realizovano je niz infrastrukturnih projekata i izrade provedbeno planske dokumentacije koji su osnova za dalji razvoj i realizaciju projekata u narednim godinama.

Provedbeno-planski dokumenti

U 2017. godini usvojeni su sljedeći planski dokumenti:

- Urbanistički projekat „Poslovno - sportski centar Trnovo“
- Izmjene i dopune Urbanističkog projekta Bjelašnica I faza i Urbanističkog projekta Bjelašnica II faza
- Odluka o Izmjenama i dopunama Regulacionog plana SRC Bjelašnica
- Odluka o pristupanju izradi Urbanističkog projekta Babin Do
- Odluka o pristupanju izradi Urbanističkog projekta Štinji Do

Projekat integrisanog turističkog grada – Buroj Ozone

Obavezu izrade glavnih projekata za infrastrukturu integrisanog turističkog grada je preuzeo investitor Buroj International. Općina je prema ugovoru obavezna da izgradi vodovod, instalacije elektro mreže, gasa i TT mreže od Babinog dola do Prečkog polja. Završena je izrada glavnog projekta vodovoda, Studije utjecaja na vode i glavni projekti infrastrukture za I fazu u obuhvatu Regulacionog plana.

Lokalni putevi

Tokom prethodne godine završeni su radovi na rekonstrukciji regionalnih i lokalnih puteva na teritoriji općine:

- Rekonstrukcija puta Gornja Grkarica – Pendičići,
- Rekonstrukcija puta Gornja Grkarica - Babin Dol - Bijeke Vode,
- Rekonstrukcija puta Garež-Delijaš,
- Asfaltiranje puta u okviru UP Bjelašnica I Faza.



Put Sinanovići - Visočica

Sanacija lokalnih puteva

- Izvršena je sanacija i asfaltiranje puteva u mjesnim zajednicama Trnovo i Delijaš: Mijanovićima, Krsmanićima, Boljanovićima, Govedovićima, Bašcima, Gračanici, Ilovicama, Balbašićima, Čunčićima i Šišićima, gdje su sredstva obezbjeđena iz OKFŠ-a. Na putevima u Mađarima, Baricama i Lisovićima planirani radovi nisu završeni do kraja zbog loših vremenskih uslova, i isti će se završiti na proljeće.
- Za sanaciju puteva MZ Dejčići i Šabići provedene su tenderske procedure, a radovi će započeti u proljeće.
- Iz sredstava Općine Trnovo izvršena je sanacija makadamskih puteva: Konik – Elezovići, Milišići – Lukavac, Lukavac- Stubo, Proskok- Krstac, Prečani-Rahovići, Ostojići-Bare, Bašci, Šišići, Bistročaj, Zagor, Presjenica, Grab.
- Izvedeno nasipanje dijela puta u Pervizima uz učešće općine i građana;
- Izvršena sanacija puteva u Mijanovićima, Slavljevićima i Boljanovićima, gdje su sredstva obezbjeđena od strane IFAD-a i općine.

Zajednički projekti sa Opštinom Trnovo

- Izgradnja puteva
Izvedeni radovi na sanaciji puta prema Turovima u dužini 1.200 m, izvedeni radovi na asfaltiranju dijela puta Trnovo – Deseci u dužini 1.000 m, te su završeni radovi na asfaltiranju puteva u centru Trnova (mahala kod džamije, parkinzi).
- Izgradnja javne rasvjete u naseljima, sredstva planirana iz rente i uređenja. – Općinski načelnik i načelnik opštine Trnovo RS potpisali su Sporazum o izgradnji rasvjete - finansira Općina Trnovo, naknadno će između dvije općine biti dogovoreno koja naselja će biti prioritet.
- Učešće u realizaciji projekta Kazani – kupalište



Asfaltiranje puta kod džamije Trnovo



Projekat pomoći takozvanih podijeljenih općina – Vijeće Evrope



Nova javna rasvjeta na Bjelašnici

Završena zamjena oštećene i postavljanje nove javne rasvjete na Bjelašnici. Radovi su podrazumijevali građevinske radove, elektro-montažne radove, ugradnju kablova, svjetiljki i ostale sitne opreme.

Radi se o LED rasvjetnim tijelima čime će se uštediti električna energija za javnu rasvjetu. Ovaj projekat finansira Općina Trnovo i Ministarstvo komunalne privrede i infrastrukture KS, a izvođač radova je Eding Telecom d.o.o.

U narednom periodu će se postavljati rasvjeta u naseljima općine Trnovo koja još uvijek nemaju rasvjetu, neka od njih su Balibašići, Čunčići, Ilovice, Obla Brda, Deseci i druga.

Vodovod "Hojta - Bjelašnica – Igman"

Izgradnja jednog od najsloženijih vodovodnih sistema "Hojta - Bjelašnica – Igman". Izvođači radova su firma Ame d.o.o. iz Breze i Orman d.o.o. Vrijednost prve faze izgradnje vodovoda za ovo područje iznosi 2.800.000 KM, a sredstva je obezbijedilo Ministarstvo privrede Kantona Sarajevo.

Završetak kompletnog projekta planiran je za novembar 2018. godine, a projektom će se obezbijediti voda za piće za prostor Bjelašnice, Igmana, Gornje i Donje Grkarice, Čakli i Proskoka, te obezbijediti neophodnu određenu količinu vode za sistem vještačkog osnježenja na Babinom Dolu.



Izgradnja rezervoara Velika Vrela



Pumpna stanica Velika Vrela - Hojta



Izgradnja kaptaže Jezero i dijela cjevovoda

Izrađen projekat i izvedeni radovi kaptaže na lokalitetu Jezero i dijelu cjevovoda do postojećeg priključnog šahta. "Stari vodozahvat se sastoji od modificiranog "Tirolskog praga" na otvorenom vodotoku, međutim obzirom da hidrološka situacija u slivu bitno utiče na kvalitet i kvantitet vode postojala je potreba za zahvatom vode direktno na postojećim izvorima. Tako da su kaptirana direktno četiri izvora, izgrađena je nova armirano-betonska sabirna komora, te mreža od izvorišta do sabirne komore. Samim tim i kapacitet i kvalitet vode, odnosno cijelog vodovodnog sistema se znatno popravio", objasnili su iz JKP Trnovo, koji su izvođač radova na ovom projektu.

Realizacijom ovog projekta očekuje se urednije snabdjevanje vodom naselja Gaj, Trebečaj, Mijanovići i Brutusi koja se direktno napajaju sa vodozahvata Jezera, kao i naselje Dujmovići koje se povremeno napaja sa ovog vodozahvata. Projekat je finansiralo Ministarstvo komunalne privrede i infrastrukture Kantona Sarajevo.



Izrada Elaborata zaštite izvorišta

U toku 2017. godine izrađeni su Elaborati zaštite za osam izvorišta na području općine Trnovo, u toku je priprema tendera za novih sedam izvorišta. Na Općinskom vijeću su donesene Odluke o zaštiti izvorišta vode za piće na području općine Trnovo. Izvorištima upravlja Javno komunalno preduzeće "Trnovo" d.o.o. Trnovo. Odlukama se utvrđuju zone sanitarne zaštite, njihova veličina, granice, mjere zaštite, zabrane i ograničenja, te monitoring kvaliteta i kvantiteta voda na izvorištu, zatim izvori i način finansiranja zaštitnih mjera, za planski period od najmanje 10 godina, kao i nadzor nad provođenjem ovih odluka, te kaznene odredbe i druga pitanja od interesa za provođenje sanitarne zaštite predmetnog izvorišta.

Urađeni su Elaborati i donesene Odluke za slijedeća izvorišta:



Izvorište "Krsinja" koristi se za vodosnadbijevanje Gračanice i Pendičića.

Izvorište "Crni potok" koristi se za vodosnadbijevanje naselja Sinanovići i Pervizi.

Izvorište "Jezera" koristi se za vodosnadbijevanje naselja Dujmovići, Trebečaj, Gaj, Mijanovići i Brutusi.

Izvorište "Zabojska" koristi se za vodosnadbijevanje naselja Delijaš, Sjeverovići, Karovići i Pomenovići.

Izvorište "Duganja" planirano je da se koristi za potrebu vodosnadbijevanja naselja Dejčići, Ostojići, Luke i Šabanci.

Izvorište "Prštetak" planirano je da se koristi za potrebu vodosnadbijevanja turističkog naselja Buroj Ozone na Prečkom polju.

Izvorište "Velika vrela" planirano je da se koristi za potrebu vodosnadbijevanja "Sportsko-rekreacionog centra Bjelašnica" na Babinom Dolu.

Izvorište "Mala vrela" planirano je da se koristi za potrebu vodosnadbijevanja naselja Rakitnica, Šabići, Lukavac, Brda i Milišići.

Hitne intervencije na čišćenju vodotoka

Projekat hitnih intervencija na čišćenju vodotoka finansira Ministarstvo privrede KS. Pomoćnik općinskog načelnika za urbanizam je naglasio da će sanacijom vodotoka biti obuhvaćene sve četiri mjesne zajednice Općine Trnovo.

Radove izvodi JKP Trnovo.

U cilju poboljšanja protoka pristupilo se uklanjanju rastinja, korova, sprudova iz korita rijeka i potoka, a radi smanjenja mogućnosti začepjenja i izlivanja vode na saobraćajnice i obradivo zemljište.

Uređenje korita je izvršeno u koritu Crne rijeke, Krsinje, Tušiočkog potoka, Presjenice, Tovarničkog potoka i potoka Vrela.



Uređenje korita u Delijašima

Mostovi

- Izgrađeni i sanirani mostovi pod Bobovicom i Podvornicama, u Šabićima i Kisjelicama
- Izgrađena dva drvena mosta na Sanabatu i izvršena sanacija mosta na Željeznici (Kijevo).
- Izvršeno je ugovaranje za izgradnju mosta na ulazu u Pomenoviće i riješeni imovinski odnosi. Za most pod Bašcima u toku je provođenje tenderskih procedura.

Izgradnja mosta u naselju Bobovica i naselju Ozimine

Na Tušiočkom potoku je u završnoj fazi izgradnja dva mosta. Dosadašnjim aktivnostima završeni su zemljani i betonski radovi. Jedan most se radi na lokalitetu – ispod naselja Bobovica, a drugi ispod naselja Ozimine. Izvršeno je zatrpavanje nasipnih materijala jednog i drugog mosta te su postavljene ograde na isti. Most ispod Bobovice finansira Općina Trnovo, a ispod sela Ozimine finansiraju građani Podvornice i Općina Trnovo. Izvođač radova je Centar Han d.o.o. Bjelašnica.



Izgradnja ograde oko mezarja u Oziminama i Žilićima

Završeno je postavljanje ograde oko malog mezarja u naselju Ozimine i Žilići, mjesne zajednice Šabići. Ukupna dužina ograde iznosi 480 metara. Radovi su obuhvatali obilježavanje, iskop i izradu betonskih temeljnih stopa za ogradu, ograda je izvedena od armaturne mreže sa otvorima koji su pričvršćeni na čelične stubove, pojasnili su u Službi za urbanizam, komunalne poslove, investicije i zaštitu čovjekove okoline Općine Trnovo. Ograda je postavljena s ciljem zaštite i očuvanja ovog mezarja. A projekat je finansirala Općina Trnovo i građani naselja Ozimina i Žilića. Izvođač radova na postavljanju ograde oko mezarja je FADŽ - COMPANY d.o.o. Ilidža., a vrijednost izvedenih radova je oko 20.000 KM.



U završnoj fazi spomen-obilježje u Dejčićima

Završena je izgradnja spomen-obilježja u Mjesnoj zajednici Dejčići. Radove su izvodili radnici građevinske firme Gros Compa iz Hadžića, dok će na hortikulturnom uređenju površine oko spomen-obilježja biti angažirani radnici komunalnog preduzeća "Park".

Projekat je finansirala Općina Trnovo i Ministarstvo za boračka pitanja KS. Ukupna vrijednost projekta iznosi 42.000 KM.

Spomen obilježje izgradilo se u znak sjećanja poginulim borcima tokom agresije na BiH sa tih prostora. Na kamenoj ploči spomen-obilježja nalaze se imena 48 šehida s ovog područja.

Sanacija autobuskih stajališta

U protekloj 2017. godini, sanirana su stajališta u Trnovu kod zgrade općine, u Pendičićima dva stajališta, zatim u naseljima Brutusi, Trebečaj, Dujmovići, Bare, Dejčići, Šabanci, izgrađena dva nova na Gaju i na putu za Ostojiće, te su obezbjeđena sredstva i izvršeno ugovaranje za stajališta u Sinanovićima, Šabićima i Lukavcu.

Polomljene nadstrešnice na stajalištima

Direkcija za puteve Kantona Sarajevo je finansirala rekonstrukciju autobuskih stajališta i postavljanje dva nova.

Plan je da se sva autobuska stajališta u svim mjesnim zajednicama rekonstruišu, na nekima će se raditi samo sanacija, dok će se na stajalištima sa većim oštećenjima raditi demontaža postojećih i postavljanje novih natkrivenih prostora za putnike. Sve čekaonice će biti iste i oblikovane su na način da zadovolje potrebe putnika u funkcionalnom smislu. S obzirom na to da lokaciju autobuskih stajališta uvjetuju potrebe javnog prijevoza, na području općine Trnovo postaviti će se i nova stajališta.

Javna imovina je često meta neodgovornih pojedinaca koji uništavaju sadnice drveća, autobuska stajališta, saobraćajne znakove, kontejnere pa stoga ovom prilikom apelujemo na sve da čuvaju ono što koriste svi stanovnici.



Obnovljeno stajalište kod zgrade Općine



Asfaltiranje oko zgrade Općine

Napreduju radovi na izgradnji objekta u Trnovu

Još početkom 2017. godine Općina je počela s prvim koracima u smjeru pripreme projekta gradnje novog i funkcionalnog objekta, jedinica koje će biti različitoga karaktera, ovisno o potrebama korisnika. Ovaj objekat se gradi na građevinskom zemljištu u vlasništvu općine, u njemu je planirana spomen-soba zatim sala za sastanke, kancelarije za potrebe organa Općine i kancelarije za boračka udruženja općine Trnovo. Do ljeta se planiraju završiti grubi građevinski radovi.



Izgradnja objekta u Trnovu

Uspostavljen adresni registar

U općini Trnovo uspostavljen adresni registar čime je zaokružen projekat numeracije objekata, te će uspostavljanjem ovog registra biti moguće izdavanje potvrde za kućni broj.

Federalna uprava za geodetske i imovinsko-pravne poslove instalirala je novi softver, softver za adresni registar, koji omogućava pomenuto.

Izgradnja škole u prirodi - Šabići

Urađen je idejni i glavni projekat za dogradnju područne škole u Šabićima, riješeni su i imovinsko-pravni odnosi čime su se stekli uslovi za izgradnju objekta.

Provedena je tenderska procedura, a za izvođača radova odabran je Centar - Han d.o.o. Sarajevo.

Projekat dogradnje objekta područne škole u Šabićima sa "školom u prirodi", koja djeluje u sastavu OŠ "Zaim Kolar" implementira Općina Trnovo, a finansijska sredstva za izgradnju će obezbijediti Ministarstvo za obrazovanje, nauku i mlade Kantona Sarajevo i Općina Trnovo. Planirani radovi su odpočeli i isti će se završiti kroz period od dvije godine.

Arhitektonsko rješenje definirano je u skladu sa programskim i funkcionalnim zahtjevima, mogućnostima koje nudi lokacija, te su funkcionalno primjereni modernom načinu korištenja, a prilagođene uslovima koji vladaju na planini.

Postojeći objekat je prizeman i sastoji se iz dvije funkcionalne cjeline. Prvu cjelinu čini edukativni dio sa dvije učionice i zajedničkom prostorijom, dok drugu cjelinu čini ugostiteljski dio sa restoranom.

Dogradnjom postojećeg objekta, predviđena je izgradnja hostelskih soba, kao i proširenje ugostiteljskih sadržaja (kamin sala, restoran, kuhinja), tako da objekat škole pored osnovnog edukativnog karaktera ima i hostelsko-ugostiteljski tj. turistički karakter, kakav i treba posjedovati jedna škola u prirodi.



Općina Trnovo bogatija za još jedan veliki infrastrukturni projekat

Implementiran je veliki značajni projekat na području općine Trnovo. Radovi na izgradnji novog vertikalnog transporta podrazumjevali su izgradnju šestosjeda i četverosjeda sa 65 korpi.

Na ovaj način će umjesto dosadašnjih 800 skijaša na sat opsluživati 1.800 skijaša, i skratiti vrijeme vožnje sa 13 minuta na 5,5 minuta.

Hidraulične platforme za topove postavljene su na svim mjestima, gdje položaj staza to zahtjeva, a izvršeni su i radovi na proširenju staza.

Okončanjem radova na vertikalnom transportu i vještačkom osnježivanju možemo sa sigurnošću tvrditi da je Bjelašnica jedan od najboljih regionalnih skicentara.

Očekuje se da će zimska sezona trajati od pet do šest mjeseci.



"Srebrna lisica"



Kako je i najavljeno prošle godine da će u narednoj zimskoj sezoni Bjelašnica biti bogatija za nove sadržaje, što se u konačnici i dešava, jedan od njih je i novo apartmansko naselje "Srebrna lisica".

Završeni su radovi na izgradnji infrastrukture, izvršeno napajanje objekata električnom energijom i izgrađen fekalni kišni kolektor, vodovod, javna rasvjeta i pristupna saobraćajnica. Na devetoj redovnoj sjednici Općinskog vijeća donešena je Odluka o povjeravanju obavljanja komunalnih djelatnosti za upravljanje i održavanje objekata i postrojenja

za odvođenje otpadnih voda i odvođenje atmosferskih voda u obuhvatu vodovodne i kanalizacione mreže Bjelašnica faza II "Centar Srebrna lisica" davaocu komunalnih usluga JKP "Trnovo" d.o.o. Trnovo.

Ovo apartmansko naselje je u okviru urbanističkog projekta Bjelašnica II, predviđena je izgradnja deset objekata, od jednog objekta je odustao prvobitni investitor, te je nakon raspisivanja licitacije Studio NONSTOP d.o.o. Sarajevo preuzeo i posljednji deseti objekat. Ostali investitori na ovom projektu su Bosman d.o.o., Emission d.o.o., Gros H&G d.o.o., Duljević d.o.o., Grakop d.o.o., Frutis d.o.o., Neimari d.o.o. i Općina Trnovo.

Cjelokupno naselje gradi se na površini od oko 15.800 kvadratnih metara. Osim apartmana, naselje će imati poslovne sadržaje, ugostiteljske objekte i prodavnice. Prizemlje naselja je izgrađeno od kamena, a svi objekti su u skladu sa okolinom i planinskim ambijentom. Fasada je od drvenih ploča, dok je krov aluminijski, zelenosive boje. Inače, cilj realizacije projekata u okviru Bjelašnice II je da sa budućim sadržajima ova planina bude atraktivna tokom cijele godine. Napominjemo, u okviru ovog projekta planirana je i izgradnja garaže koja će imati kapacitet 85 parking mjesta.

Uspješna zimska sezona na Bjelašnici

Zimsku sezonu 2017/2018 obilježilo je dovoljno snijega ali i sunca na Bjelašnici, što čini idealne uvjete za provesti vrijeme na ovoj olimpijskoj ljepotici uživajući u prirodi. Veliki broj posjetitelja, Sarajlija ali i turista posjetilo je Bjelašnicu kako bi svoje vrijeme iskoristili, ne samo u prirodi uz šetnju već i uživanju u zimskim sportovima.

Skijalište je radilo punim kapacitetom, sve staze su bile u funkciji, prepune skijaša i snowboardera. Novi vertikalni transport, izuzetno uređene staze, bogata gastro ponuda su učinili da Bjelašnicu i Igman posjeti veliki broj kako domaćih, tako i stranih gostiju. Zabilježena je rekordna posjeta ski-centru.

Općina Trnovo kroz planirane aktivnosti i kontinuiran rad se svakodnevno brine da svi građani koji posjete područje naše općine u potpunosti dožive prirodne ljepote i jednostavno uživaju u trenucima odmora.



Bjelašnica centralno mjesto događanja

Općina Trnovo bila je partner Studentskog pohoda na Bjelašnicu, koji se održao, 17.02.2018. godine. Naime, u čast olimpijskih igara po prvi put na Bjelašnici napravljeni su veliki olimpijski krugovi uz pomoć hiljade studenata učesnika pohoda i tako je na najljepši mogući način vraćeno sjećanje na Olimpijadu u Sarajevu.

Mladi su od ranih jutarnjih sati imali priliku učestvovati u takmičenjima u fudbalu, odbojci, vuči konopca, skakanju u vrećama. Uz pomoć partnera Studentskih pohoda subvencionirane su karte, svim studentima koji skijaju ili bordaju, omogućeno je besplatno sniježno iskustvo na Bjelašničkim stazama. Istog dana, održan je i jedanaesti po redu Kup Srebrna Lisica, što je ujedno bilo i testno takmičenje za Evropski omladinski olimpijski festival koji će 2019. godine biti održan u Sarajevu i Istočnom Sarajevu.

Takmičenje je počelo u 17:00 sati, a u 19:00 sati je započela noćna trka parallel slaloma. Kategorije takmičara su dječaci i djevojčice od 8 do 16 godina. Održavanje testnog takmičenja predstavlja finalni test koordinacije svih sektora unutar EYOF-a. Dakle, testiran je veliki broj organizacionih segmenata za EYOF 2019.



Općina podržala rad ski kluba Bjelašnica

Općina Trnovo finansijski je podržala SK Bjelašnica kao jedan od naših najtrofejnijih klubova. Naime, već je dobro poznato da od 9. do 16. februara 2019. godine Bosna i Hercegovina će biti domaćin Evropskog omladinskog olimpijskog festivala. Ovo je razlog zašto je posljednjih godina Općina Trnovo svoju primarnu razvojnu orijentaciju usmjerila ka olimpijskom ski centru Bjelašnica, i krajnji cilj je da se rekonstrukcijom postojećih i izgradnjom novih objekata na Igmanu i Bjelašnici obogati cjelogodišnja turistička ponuda. Ski klub Bjelašnica na padinama istoimene planine datira od 2003. godine kada je održana osnivačka skupština u Hotelu Maršal. Od dana osnivanja ski kluba, počeo je niz osvajanja trofeja te su danas takmičari ovog kluba afirmirani skijaši a veliki dio njih je na liderskim pozicijama.



Na pitanje kako gleda na podršku općine Trnovo, Predsjednik SK Bjelašnica, gospodin Hamid Kantardžić je odgovorio: "Jako sam počašćen odlukom gospodina Berila da naš klub podrži u daljem radu. Naš klub na padinama Bjelašnice trenira već 15 godina i veoma nam je drago što je podrška došla sa našeg lokalnog i matičnog nivoa, Općine Trnovo. Osnivači ski kluba Bjelašnica (Veterani) podržavaju naš rad dugi niz godina i sada se nadamo da će i Općina Trnovo biti dio naše perspektivne budućnosti. Kao dokaz da su pred nama godine uspjeha je takmičenje Ski Kupa Bosne i Hercegovine "Otvoreno prvenstvo Opštine Pale" koje se održalo na Ravnoj Planini proteklog vikenda. Naši



takmičari su osvojili 6 zlatnih i 5 srebrnih medalja što nas je svrstalo u apsolutne pobjednike ovog takmičenja. Ono što Ski klub Bjelašnicu krase dugi niz godina i po čemu je među skijašima u Bosni i Hercegovini i u regionu poznata jeste Kup Srebrna lisica. To je najbolje organizovano takmičenje sa najvećim brojem učesnika i najvećim fondom za nagrade. Naš ski klub će svakako biti i na raspolaganju velikoj olimpijskoj smotri mladih, EYOF 2019 jer naša namjera je da ova manifestacija bude na savršenom nivou i da naša matična planina bude na pozitivan način promovisana, tu priliku moramo iskoristiti u tu svrhu. Ski sport je jako skup i ova podrška kao i svaka druga nam je dobrodošla, veliko hvala Općini Trnovo i gospodinu Berilu."

Općinski načelnik, Ibro Berilo rekao je: "Smatram da rezultati naših sportista iziskuju sredstva kojim bismo pomogli njihov daljnji razvoj. Trebamo na odgovarajući način podržati sport i uspjehe naših sportista, a to je da im osiguramo kvalitetne pripreme na osnovu kojih mogu postići dobre rezultate."



Senahid Godinjak, direktor EYOF-a

Možete li nam reći nešto više o organizaciji EYOF 2019 ?

U periodu od 09-16.02.2019.godine u Sarajevu i Istočnom Sarajevu će se simbolično održati četrnaesti olimpijski festival mladih-EYOF 2019. Ono što je važno kazati ja da će dva grada Sarajevo i Istočno Sarajevo zajedno organizirati i participirati ove velike sportske igre mladih i mogu slobodno reći da je ovo najveći sportski događaj na ovim prostorima nakon Olimpijade u Sarajevu 1984.godine. Na programu sportova nalaziti će se discipline ili sportovi iz oblasti skijanja i oblasti klizačkih sportova. Kada su klizački sportovi u pitanju, onda je distribucija sportova po gradovima sljedeća: Zetra- turnir u hokeju, Skenderija- program umjetničkog klizanja, dvorana na Palama-curling, Istočno Sarajevo (pomoćni stadion F.K. Slavija)- short track. Kada su u pitanju skijaški sportovi program održavanja je sljedeći: Jahorina- alpsko skijanje (slalom i veleslalom), Dvorišta- biatlon, Bjelašnica- snowboard i tim paralel slalom za sve zemlje učesnice, Igman-cross country. Očekujemo participaciju oko 1600 sportista sa pratećim sektorima, treneri, medicinsko osoblje, zaštitari, i sve ono što je potrebno za učešće u tako velikom takmičenju.

Gdje je planiran smještaj za sve učesnike i prateće sektore osoblja ?

Ekipe će biti smještene u našem Olimpijskom selu u hotelima Hollywood i Hills na Ilidži.

Možete li nam objasniti kakvi su rezultati postignuti kada je u pitanju infrastrukturno uređenje, skijališta i ostali sadržaj za potrebe održavanja svih navedenih sportova?

Ako se baziramo na ove dvije planine Bjelašnicu i Igman onda smo u raskoraku na način da smo u prošloj godini imali velika infrastrukturna ulaganja na Bjelašnici gdje smo pripremili zaista ono što je nama neophodno za realizaciju ova dva sporta, dobili smo sada jedan optimum uslova pogotovo kada je alpsko skijanje u pitanju ali kada je snowboard u pitanju imamo malu tehničku

doradu na vještačkom osnježavanju koju planiramo uraditi ove godine a za koju su već izdvojena sredstva u Kantonalnom budžetu, tako da očekujemo da to možemo završiti bez nekih velikih napora. Kada je u pitanju Igman, finansijska sredstva za adaptaciju i rekonstrukcije staze za cross country imamo, i ona su već prebačena na račun ZOI-84 kao izvođača tih radova, ali smo naišli na jednu vrlo zahtjevnu administrativnu proceduru jer je bilo puno neriješenih pitanja između Općine, Kantona, Zavoda za planiranje za izgradnju KS, Sarajevo-šuma, gdje je bio problem oko nadležnosti nivoa vlasti, na čemu smo izgubili skoro godinu dana. Čini mi se da smo uspjeli prevazići sve administrativne barijere i da smo poravnali relacije između gore navedenih subjekata i da ćemo nadam se po završetku skijaške sezone i početku sezone građenja početi sa adaptacijom koju je nužno uraditi.

Planirana su testna takmičenja, recite nam nešto o tome ?

Bjelašnica će u februaru biti centralno mjesto događanja programa koji smo mi kroz naš projekat testnih takmičenja „Road to EYOF“ pripremili i organizovati ćemo Evropa kup takmičenje u snowboard-u, a na glavnoj stazi će biti održano takmičenje u tim paralel slalomu. Kroz organizaciju ova dva takmičenja, koja su također takmičenja sa programa EYOF-a, testirati jako veliki broj naših organizacionih segmenata, ne samo infrastrukturu u smislu borilišta i staze ili tehničkog dijela, već imamo plan da testiramo i određene organizacione segmente sa aspekta EYOF-a kao što su ceremonije koje će se održavati po završetku svakog sporta, katering i ishrana takmičara, soniranje borilišta, IT sistem gdje će biti live streaming odnosno direktno prenošenje svih sportskih događaja, kao i sav ostali prateći sadržaj.

Direktore hvala Vam puno.

Hvala Vama što ste iskazali interesovanje za EYOF.



Aktivnosti Općinskog vijeća Trnovo

Općinsko vijeće Trnovo kao predstavničko tijelo građana i tijelo lokalne samouprave donosi akte u okviru djelokruga Općine Trnovo te obavlja druge poslove u skladu sa zakonom i Statutom Općine Trnovo. Općinsko vijeće, u ovom sazivu, je održalo ukupno deset sjednica, dok je u 2017. godini održano njih sedam.

Program rada Općinskog vijeća za 2017. godinu usklađen je sa programom rada Općinskog načelnika, te su te aktivnosti uglavnom uspješno realizovane.

Vijeće je usvojilo Program rada Općinskog vijeća i Općinskog načelnika za 2018. godinu čime su definisani osnovni pravci djelovanja lokalne izvršne vlasti za 2018. godinu.

Usvojen Budžet Općine za 2018. godinu

Općinsko vijeće Trnovo je na desetoj redovnoj sjednici 28. decembra 2017. godine usvojilo Budžet Općine koji iznosi 17.556.758,71 KM i Odluku o izvršavanju Budžeta Općine Trnovo za 2018. godinu kojom se uređuju struktura prihoda i primitaka, rashoda i izdataka budžeta, njegovo izvršenje, prioriteti plaćanja i finansijsko izvještavanje. Izdvojiti ćemo da kada je riječ o planiranim izdacima za bruto plaće i naknade izdvaja se 10% usvojenog Budžeta.

Budžet Općine je razvojni i socijalni, te je važno istaći da će za kapitalne projekte biti utrošeno 85% Budžeta Općine, a neki od njih su: izgradnja podzemne garaže na Bjelašnici, izgradnja poslovno-sportskog centra na Bjelašnici, izgradnja vodovoda za Prečko polje, zatim projekat dogradnje škole u prirodi u Šabićima, rješavanje imovinsko-pravnih odnosa, izgradnja saobraćajnica, rekonstrukcija i izgradnja objekata infrastrukture i drugih planiranih projekata.



Općinsko vijeće, u ovom sazivu, je do sada usvojilo ukupno 76 odluka, od kojih su za dalji razvoj općine Trnovo najznačajnije :

Odluka o usvajanju i provođenju UP Poslovno Sportski Centar Trnovo, Odluka o pristupanju izradi UP "Bjelašnica-Štinji do", Odluke o usvajanju i provođenju izmjena i dopuna Odluka UP-a Bjelašnica I i II faza, Odluka o formiranju JP Elektro Trnovo d.o.o Trnovo s ciljem pokretanja inicijativa i aktivnosti radi stavljanja u funkciju hidro potencijala Bijele i Crne rijeke, Odluke o usvajanju Elaborata o zaštiti izvorišta vode za piće, ukupno njih 8. Usvojena je i Odluka o pristupanju izradi Strategije održivog razvoja općine Trnovo za period 2018 - 2022. godina, što će dati smjernice i jasan cilj koji vodi napredku i razvoju općine Trnovo.



Obilježen Dan Državnosti BiH

Dan državnosti Bosne i Hercegovine, 25. novembar obilježen je polaganjem cvijeća na spomen obilježju "Vječna Vatra", mezarju Kovači, spomen obilježju ubijenoj djeci opkoljenog Sarajeva i spomen park Vraca.

Delegacije ispred Općine Trnovo na čelu sa predsjedavajućom Općinskog vijeća Trnovo položila je cvijeće na sva pomenuta spomen obilježja.



POSLOVNO - SPORTSKI CENTAR TRNOVO

Usvajanjem provedbeno planskih dokumenata stvaraju se pretpostavke za realizaciju projekata kako zimske tako i ljetne ponude na prostoru Bjelašnice i Igmana.



Urbanistički Projekat “poslovno - sportski centar Trnovo”

Koncept prostorne organizacije je baziran na formiranju trenažnog centra za profesionalne sportiste koji se sastoji od sportskih terena i objekata koji su u funkciji sportskog centra. Planom je predviđeno korištenje sportskih površina u ljetnom i zimskom periodu.

Planirana je izgradnja glavnog nogometnog terena dimenzija 115 x 75 m, pokrivenog prirodnom travom sa tribinom sa istočne strane sa 1000 mjesta. Iza tribina je planiran objekat koji će objединiti funkcije neophodne za sportiste koji koriste teren, kao i servis za posjetioce. U produžetku ovog terena planiran je teren pokriven vještačkom travom koji se u zimskim mjesecima pokriva konstrukcijom hale - balona, položaj navedenog objekta obezbjeđuje i toplu vezu sa prostorom pokrivenim balonom.

Centar će sadržavati i višenamjenski teren sa prirodnom travom, dimenzija 96 x 44, za nogomet, mali nogomet, košarku, rukomet i odbojku.

Dok južno od natkrivenog terena, odnosno balon hale smještene su 4 terena koji su postavljeni kaskadno kao dvojni. Jedan dvojni teren je namijenjen za mali nogomet i rukomet, a drugi dvojni za košarku i odbojku. Svi dvojni tereni su 44 x 24 m i mogu se prenamijeniti po potrebi.



Sportska dvorana i hotel

Sportska dvorana kao centralni objekat biće kapaciteta 500 mjesta za gledaoce, sa pratećim sadržajima. Planiran je i hotel kapaciteta 98 ležajeva, sa garažom u podrumu objekta kapaciteta 30 parking mjesta, ovaj objekat programski zadovoljava osnovnu namjenu sportskog centra – smještaj i boravak sportista (prostorije za sastanke/strateška planiranja, polivalentna dvorana za konferencije, edukativne skupove i sl.), višenamjenski prostor za odmor/okupljanje/zabavu, bazen, fitness i spa segment, teretana, sauna, kuglana, priručna ambulanta/apoteka itd.



Poslovni centar

Ovaj objekat treba da objedini funkcije koj su komplementarne okupljanju sportista i sportskog menadžmenta (susreti, sastanci, prezentacije, konferencije i sl.), administrativni dio za potrebe općine, predstavništva firmi sportske opreme i ostalih segmenata sportske industrije koji svoj interes mogu naći na planini Bjelašnici, te funkcije uprave poslovno-sportskog centra. Poslovno-sportski centar Trnovo kao cjelina u prvom redu je predviđen za trenažni program i pripreme profesionalnih sportista tokom cijele godine. Međutim u skladu sa rasporedom tokom godine, aktivnosti sportskog centra trebaju biti dostupne svima, posebno djeci predškolske i školske dobi, studentima, te ekskurzijama kao i dnevnim posjetiocima.

U skladu sa navedenim, osim navedenih objekata sportske dvorane sa hotelom i poslovnim centrom, planirana je izgradnja i drugih objekata smještajnih kapaciteta sa pratećim sadržajima sportsko rekreativnog i

edukacionog karaktera. Za sve objekte sa apartmanima je predviđena jedinstvena arhitektura i oblikovanje. Na najvišem uzvišenju na lokaciji je predviđen i restoran-vidikovac. Vidikovcu se pristupa preko pješačkih staza koje vode kroz šumu gdje je predviđena mogućnost formiranja adrenalinskog parka i prostor za igru i zabavu djece. Vidikovac je također povezan i sa servisnom saobraćajnicom. Uz zapadnu servisnu saobraćajnicu je predviđeno i 14 parking mjesta za posjetioce vidikovca.

Svi objekti u obuhvatu Plana, predviđeni za gradnju su u skladu sa sa prirodnim okruženjem u svim segmentima.

Planom se predlaže utvrđivanje jednosmjernog režima odvijanja saobraćaja kada je u pitanju interna saobraćajnica, što omogućava realizaciju biciklističke staze na kolovozu, čime se postiže smanjenje prostornih zahtjeva i minimaliziranje uticaja na krajolik. Koncept prostorne organizacije je planiran na način da se u potpunosti obezbijedi zaštita prirodne sredine.



Delegacija općine Trnovo posjetila opštinu Čajetina

Petnaestočlana delegacija općine Trnovo iz BiH posjetila je u oktobru mjesecu opštinu Čajetina. U razgovoru sa predstavnicima čajetinske opštine, dogovoren je početak saradnje između ove dvije opštine koje su po mnogo čemu slične-privredno i turistički.

Sa druge strane, imaju gotovo identične probleme, pa je dogovoreno da se ova saradnja nastavi u kulturnom, turističkom i privrednom smislu, ali i da jedni od drugih iskoriste iskustva, kako bi prevazišli identičan problem.



Obje općine zauzimaju velike teritorije koje se nalaze na padinama planina, bogate prirodnim resursima, sa stabilnim budžetima i perspektivom za daljnji razvoj i sličnim strateškim opredjeljenjima.

Prvi čovjek čajetinske opštine poručio je gostima da su uvek dobrodošli na Zlatibor i podsjetio ih na neka davna vremena kada su Zlatiborci trgovali u Sarajevu.

Sastanak sa privrednicima

Općinski načelnik je 09.01.2018. godine priredio sastanak za privrednike s područja općine Trnovo i privredne subjekte s kojima Općina sarađuje. Načelnik, Ibro Berilo je ovom prilikom predstavio investicione potencijale općine Trnovo, naglašavajući otvorenost Općine za investicije, te predstavio sve planirane urbanističke projekte, ali i projekte koji su u toku, te se ovom prilikom još jedanput zahvalio i Vladi Kantona Sarajevo za velike infrastrukturne projekte završene u prethodnom periodu na Bjelašnici, te poželio svim prisutnim mnogo sreće i uspjeha u novoj 2018. godini.

Privrednici su iskazali zahvalnost načelniku za ovakav gest, te zadovoljstvo i zainteresovanost za produbljivanje saradnje sa općinom Trnovo.

Sastanku je prisustvovao ministar privrede Kantona Sarajevo, gospodin Muharem Šabić, te je istakao kako se zaista ulažu ogromni naponi kako bi se Bjelašnici vratio stari sjaj, te pozvao investitore da nastave ulagati u dalji razvoj Općine Trnovo, jer općina Trnovo ima zaista ogroman turistički potencijal. Najavio je nastavak projekata, tačnije izgradnju sankake staze, te rekao kako sve ovo znači otvaranje nove perspektive i stvaranje što boljeg poslovnog okruženja.

Prisutnima se obratio i gospodin Asim Sarajlić koji je imao samo riječi hvale za rad općinskog načelnika, i istakao kako su konačno dugogodišnji planovi i riječi sprovedena u djela, te kako Bjelašnica sada zaista predstavlja jednu modernu urbanu sredinu.



Potencijali Općine Trnovo

Područje općine Trnovo odlikuje nenarušeni prirodni sklad, nezagađena okolina i veliki prirodni potencijal za razvoj turizma i poljoprivrede sa fokusom na organsku proizvodnju. Općinski načelnik sa timom saradnika je posvećen olakšavanju ulaganja i kreiranju modernog poslovnog okruženja za razvoj poslovanja sa ciljem postavljanja visokih standarda za život i napredovanje u općini Trnovo. Održivi razvoj uz poštivanje postojećih geografsko-reljefnih odlika, klimatskih uslova, prirodnih fenomena, te historijsko-kulturoloških znamenitosti je od velikog značaja kod izgradnje novih infrastrukturnih objekata kao preduslov za povećanje smještajnih kapaciteta. Općina Trnovo ima veliki potencijal kada je riječ o zimskom i ljetnom turizmu, ali i o zdravstvenom i seoskom turizmu. Poljoprivredni sektor najveći potencijal vidi u proizvodnji organske hrane.

Dodjela sredstava po javnom pozivu

Po javnom pozivu za nagrađivanje uspješnih poljoprivrednika Općina Trnovo izdvojila je iz Budžeta 80.000,00 KM. Poticaj stočarskoj proizvodnji u Općini Trnovo dobilo je 35 korisnika iz ove općine koji se bave ovčarstvom. Dodijeljena su sredstva i za korisnike koji se bave uzgojom povrća i malina. Uspješnih korisnika koji se bave uzgojom malina ima 4 na području naše općine, a 6 je korisnika koji se bave povrtlarstvom. Zahvaljujući dobijenim sredstvima korisnici će uvećati svoj stočni fond i povećati proizvodnju.

Nekima od korisnika ovo je jedini izvor prihoda, a ističu da se od poljoprivrede može živjeti, iako je potrebno mnogo rada i odricanja. Jedan od korisnika koji se bave zemljoradnjom na području naše općine je mladi Ajdin Hodžić, student geografije, stanovnik Mjesne zajednice Delijaš koji je dobio sredstva kao nagradu za uspješan uzgoj malina. Hodžić kaže kako će sredstva iskoristiti da unaprijedi i poveća proizvodnju ovog voća, ističe kako ima dosta troškova i ulaganja i kako je glavni problem niska otkupna cijena maline, koja ove godine nije bila veća od 1,5 maraka po kilogramu.



Potpisan Memorandum o razumijevanju i saradnji između Općine Trnovo i Službe za zapošljavanje KS

U novembru mjesecu potpisan je Memorandum o razumijevanju i saradnji između Općine Trnovo i Službe za zapošljavanje KS.

U cilju ostvarivanja zajedničkih interesa od značaja za razvoj privrede, unapređenja uslova za ekonomski rast, otvaranja novih radnih mjesta i smanjenja nezaposlenosti u Općini Trnovo, općinski načelnik Ibro Berilo i direktor JU „Služba za zapošljavanje Kantona Sarajevo“ Sarajevo Midhat Osmanbegović potpisali su Memorandum o razumijevanju i saradnji.



Potpisana je poslovna i stručna saradnja u realizaciji programa zapošljavanja, programa obuke, dokvalifikacije i prekvalifikacije nezaposlenih osoba, te drugih programa i aktivnosti između Općine Trnovo i JU „Služba za zapošljavanje Kantona Sarajevo“ Sarajevo kroz, prije svega jedan partnerski odnos i transparentan rad, a sve s ciljem smanjenja nezaposlenosti u Općini Trnovo.

Tipski kiosci

Općinsko vijeće donijelo je Odluku o načinu i uslovima dodjele u zakup tipskih kioska na području općine Trnovo. Prema ovoj Odluci tipskim kioskom smatraju se pokretni objekti u vlasništvu Općine Trnovo, čija je namjena pružanje usluga u turizmu, prodaja rukotvorina ili poljoprivrednih proizvoda. Tipski kiosci će se dodijeliti u zakup za obavljanje djelatnosti pravnih i fizičkih lica koji imaju prijavljeno prebivalište i imaju registrovanu djelatnost na području općine Trnovo. Davanjem u zakup tipskih kioska Općina Trnovo ima za cilj pospješivanje razvoja turizma na području općine Trnovo ali i unaprijeđenje prodaje poljoprivrednih proizvoda i rukotvorina karakterističnih za ovo područje, kao i otvaranje novih radnih mjesta.

Općinski načelnik Ibro Berilo je istakao kako se ovim želi spriječiti dosadašnja ulična prodaja poljoprivrednih proizvoda i rukotvorina na neuslovnim mjestima, te će se izdavanjem u zakup kioska na jedinstven i prepoznatljiv način uvesti red u ovoj oblasti i omogućiti građanima sa područja općine Trnovo ostvarivanje prihoda po osnovu obavljanja različitih djelatnosti u iznajmljenim kioskima.

Prema idejno-izvedbenom projektu tipski kiosci su iste veličine i identičnog izgleda, do sada je postavljeno jedanaest kioska.



Tipski kiosci na Bjelašnici dodijeljeni u zakup

U decembru 2017. godine potpisani su ugovori o dodijeli u zakup 11 tipskih kioska, za 11 pravnih i fizičkih lica koja imaju prijavljeno prebivalište i imaju registrovanu djelatnost na području općine Trnovo. Općinski načelnik je potpisao ugovore uz uvodno izlaganje, gdje je istakao kako je zadovoljan ovim projektom jer se na jedinstven i prepoznatljiv način uveo red u ovoj oblasti, zamolio je sve potpisnike ugovora da se zadrži jednoobraznost postavljenih objekata i da način



izlaganja robe i proizvoda bude isti. Načelnik je rekao kako će komunalna inspekcija Općine biti mobilna na terenu i pratiti rad svih korisnika, ali i eliminisati ilegalnu konkurenciju s područja Babinog Dola ukoliko je bude bilo uz propisanu novčanu kaznu.

Projekat tipskih kioska na području općine Trnovo će biti nastavljen i u 2018. godini, planirano je postavljanje 50 ovakvih kućica na svim mjestima gdje je moguća prodaja, čime će se unaprijediti prodaja poljoprivrednih proizvoda i rukotvorina karakterističnih za ovo područje, kao i otvaranje novih radnih mjesta.



Obilježena 23.godišnjica Diverzantske akcije u reonu Čakle- Proskok

Povodom obilježavanja 23.godišnjice Diverzantske akcije u reonu Čakle-Proskok, u petak, 06. oktobra učesnici same akcije, predstavnici Općine Trnovo na čelu sa načelnikom i predsjedavajućom Općinskog vijeća, zatim predstavnici Federalnog Ministarstva za boračka pitanja, Ministarstva za boračka pitanja KS, predstavnici boračkih udruženja i naravno brojni građani općine Trnovo okupili su se najprije na Igmanu-Spomen obilježju, šehidskom mezarju gdje su delegacije položile cvijeće.

I ove godine, za 23.godišnjicu organizovan je i pohod u čast obilježavanja akcije diverzantsko izviđačkog voda 1. Bošnjačke brigade od 06.10.1994. godine u reonu Čakle-Proskok. Učesnici pohoda pješačili su stazom od Strajšta do Proskoka.



Masakr na Markalama- historijskoj jezgri Sarajeva

Masakri na Markalama su dva masakra počinjena nad sarajevskim civilima tokom opsade Sarajeva za vrijeme rata u Bosni i Hercegovini.

Prvi se dogodio 5. februara 1994. godine kada je 68 ljudi ubijeno, a 144 ranjeno. Drugi se dogodio 28. avgusta 1995.godine, a ubijeno je 37 ljudi, dok je ranjeno 90.

Jučer, 05.02.2018. godine, u povodu obilježavanja 24. godišnjice stradanja građana Sarajeva na pijaci Markale održana je komemorativna sjednica Skupštine Kantona Sarajevo, Gradskog vijeća Sarajeva i općinskih vijeća s područja Kantona Sarajevo.

Komemorativna sjednica održana je u Narodnom pozorištu, nakon čega su brojne delegacije, a najprije porodice stradalih građana položile cvijeće na spomen-obilježju na ovoj gradskoj pijaci, historijskoj jezgri Sarajeva.

Delegacija Općine Trnovo je odala počast žrtvama i položila cvijeće.

Dan policije

Povodom dana SJB Trnovo u organizaciji udruženje boraca "Patriotska liga" općine Trnovo održan je prigodan program i učenje Jasina na šehidskom spomen obilježju kod zgrade Općine. Programu su prisustvovali brojni građani Trnova, članovi šehidskih



porodica, predstavnici boračkih udruženja, ministar za boračka pitanja KS Muharem Fišo, predsjedavajuća Općinskog vijeća Trnovo Emina Mehmedagić, općinski vijećnici, pomoćnici Općinskog načelnika, zastupnik u Skupštini KS Hamed Aljović.

Polaganjem cvijeća i učenjem Fatihe na spomen obilježju u Trnovu obilježena je 26. godišnjica mobilizacije aktivnog i rezervnog sastava policije Stanice javne bezbjednosti Trnovo.

Prisutnim je načelnik iz tadašnjeg vremena SJB Trnovo, gospodin Edhem Godinjak u svom obraćanju istakao značaj obilježavanja ovog datuma, i rekao kako iskazuje duboku zahvalnost i sjećanje svim šehidima i poginulim i umrlim policajcima Trnova, te ostalim borcima Armije BiH i MUP-a RBiH.

Ministar za boračka pitanja Kantona Sarajevo Muharem Fišo također se obratio prisutnim riječima:

"U časnoj borbi i htijenju da se sačuva BiH moramo odati priznanje svim demobilisanim borcima, preživjelim veteranima i pripadnicima MUP-a, da se nikad ne zaboravi herojska borba najpoštenije Armije i MUP-a". Cvijeće su položile i Fatihu proučile delegacije Općine Trnovo, Boračkih udruženja Trnovo, delegacija ispred Ministarstva za boračka pitanja KS na čelu sa ministrom, zatim delegacija ispred Koordinacije boračkih udruženja KS, Saveza Patriotske KS i 182 Viteške brigade.

Općina Trnovo dobila je svoju Policijsku stanicu

Pravilnikom o unutrašnjoj organizaciji MUP-a Kantona Sarajevo, koji je stupio na snagu 17.07.2017. godine dosadašnje Policijsko odjeljenje Trnovo je reorganizovano u Policijsku stanicu Trnovo.

Općina Trnovo na čelu sa općinskim načelnikom već par godina radi na tome da se na području Trnova uspostavi Policijska stanica što se u konačnici desilo.

Promjenom iz Policijskog odjeljenja u Policijsku stanicu povećao se broj izvršilaca, samim time veći broj policijskih službenika će biti na terenu što će povećati sigurnost građana ali i imovine.

Općina Trnovo je iz Budžeta izdvojila sredstva za pomoć pri opremanju Policijske stanice Trnovo.

Policijski službenici PS Trnovo će biti angažirani i na zadacima saradnje sa lokalnom zajednicom.

Dani otpora Kijeva

Udruženje Ratnih vojnih invalida Općine Trnovo bilo je organizator obilježavanja godišnjice "Dani otpora Kijeva".

Povodom godišnjice održan je prigodan program i učenje Jasina na šehidskom mezarju u Kijevu. Na programu obilježavanja su bili prisutni predstavnici Općine Trnovo i predsjedavajuća Općinskog vijeća Trnovo, predstavnici boračkih udruženja, zatim porodice poginulih šehida iz Kijeva, te građani Kijeva i općine.

Učenjem Jasin-dove odata je počast svim šehidima. Delegacija ispred Općine Trnovo i delegacija ispred porodica šehida je položila cvijeće u mezaristanu Kijevu.



Oslobađanje Hojte

U organizaciji 4. Viteške motorizovane brigade 30.10.2017. godine obilježena je godišnjica svih značajnih bitaka van zone odgovornosti ove brigade. Obilježavanju godišnjice prisustvovali su učenici naše Osnovne škole "Zaim Kolar" Dejčići, zatim Prva osnovna škola Ilidža, Druga osnovna škola Ilidža- Hrasnica, Četvrta osnovna škola Ilidža –Hrasnica, zatim Peta osnovna škola Ilidža – Sokolović Kolonija i Osmo osnovna škola "Amer Čenanović" Ilidža –Butmir.

Održan je historijski čas o onome što se dešavalo na ovom području u proteklom ratu i stradanjima članova brigade. Prisutnim se obratio general Fikret Pljevljak i istakao važnost ovog obilježavanja, kao i važnost prisustva učenika i mladih ljudi kako bi osjetili potrebu da nastave čuvati sjećanje i spomenike i onda kada njihovih roditelja više ne bude.

Uz brojno prisustvo građana općine Trnovo ali i općine Ilidža obilježena je godišnjica, na samom kraju protokola obilježavanja nakon historijskog časa, tematskog vojničkog ručka za učenike i prisutne položeno je cvijeće na dva spomen obilježja na ovom području. Odata je počast i položeno cvijeće na Bijelim

Vodama, ispred spomen obilježja Čengić Jasmina i ispred spomen obilježja "Zlatnog ljiljana" Sarajkić Ejuba – Eke.



Općinski načelnik primio Zahvalnicu JOB-a "Unije veterana" KS

Dana 15.11.2017. godine povodom obilježavanja 25. godišnjice "Dana Veterana" Kantona Sarajevo u domu Oružanih snaga RBiH upriličena je Svečana akademija. Na svečanoj akademiji dodijeljene su Povelje i Zahvalnice zaslužnim za brigu o svim boračkim kategorijama, kao i za razvoj i jačanje Jedinствene organizacije boraca "Unije Veterana" Kantona Sarajevo.

Općinski načelnik, Ibro Berilo zbog ranije preuzetih obaveza nije mogao prisustvovati ovom svečanom obilježavanju pa mu je Zahvalnica JOB-a "Unije veterana" Kantona Sarajevo uručena naknadno. Predsjednik Upravnog odbora JOB-a općine Trnovo, gospodin Zakir Imamović načelniku je uručio ovu zahvalnicu kao priznanje koje se dodjeljuje za izuzetan doprinos Općine Trnovo u razvoju i jačanju Jedinствene organizacije boraca „Unije Veterana“ Kantona Sarajevo za uporan i nesebičan rad u ostvarenju statusnog položaja svih boračkih kategorija.



Civilna zaštita Općine Trnovo

Civilna zaštita je sistem organiziranja operativnih snaga i građana za ostvarivanje zaštite i spašavanja ljudi, životinja, materijalnih i kulturnih dobara i okoliša u velikim nesrećama i katastrofama. Zadatak službe civilne zaštite i svih službi odnosno jedinica zaštite i spašavanja je praćenje i procjenjivanje situacije na području općine sa aspekta potreba preduzimanja preventivnih i operativnih mjera zaštite ljudi i materijalnih dobara od prirodnih i drugih nesreća i odsticanje i usmjeravanje aktivnosti svih organa vlasti i pravnih lica kao i građana u izvršavanju poslova zaštite i spašavanja koji su stavljeni u njihovu nadležnost.

Služba civilne zaštite općine Trnovo, je za period 2017. godine, u saradnji sa DVD Trnovo i službama za zimsko održavanje puteva sve zadatke koji spadaju u opseg zaštite i spašavanja ljudi i materijalnih dobara i zaštite okoliša rješavala na pristojnom nivou s obzirom na skromnu opremljenost svih jedinica zaštite i spašavanja.



U toku 2017.godine evidentirano je i uspješno ugašeno/lokalizovano 42 požara na teritoriji koja pripada općini Trnovo, a sve to zahvaljujući izuzetnom zalaganju pripadnika DVD Trnovo koji su odmah po dojavu o požaru bili na mjestu i reagovali na način da su svaku akciju gašenja požara uspješno izveli i tako spriječili mnogo veću materijalnu štetu i nisu dozvolili ugrožavanje stanovništva.

Kada su u pitanju prirodne i druge nesreće 2017.godina je za stanovnike općine Trnovo bila relativno mirna i nije bilo većih ugrožavanja ljudi i imovine. Evidentirali smo i uspješno spriječili dva vala poplava, prvi početkom juna kada se u naselju Gračanica usljed nanosa bujičnih potoka aktiviralo i klizište koje je djelimično sanirano tako da nije bilo daljeg ugrožavanja imovine. Drugi val poplava dogodio se sredinom decembra kada su sa porastom vodostaja nakon obilnih padavina, poplavile rijeke Željeznica i Rakitnica i pri tome pričinile neznatnu materijalnu štetu. Pripadnici službi civilne zaštite su bili na terenu i tako pravovremeno reagovali kako bi se poplave stavile pod

kontrolu i kako se ne bi nastavilo dalje ugrožavanje ljudi i materijalnih dobara. Sto se tiče snježnih padavina najveća zabilježena visina snježnog pokrivača je bila u martu 2017.godinu kada je dostizala visinu i preko 50 cm na prostoru MZ Šabići i Trnovo, ove snježne padavine nisu bitnije ugrozile i otežale normalno funkcionisanje života na tim područjima, a nadležne zimske službe su odmah izvršile čišćenje saobraćajnica gdje je to trebalo.

Napominjemo i apelujemo na građane, sva fizička i pravna lica, da su dužni ODMAH ČIM primijete ili saznaju za neku opasnost ili pojavu koja može dovesti do nastanka prirodne i druge nesreće da sve podatke dostave na sljedeće brojeve telefona:

**Operativnom centru civilne zaštite
(033-586-701);
Dobrovoljnom vatrogasnom Društvu
(033-439-011);
Policijskoj stanici Trnovo
(033-439-000).**

Učešće i nagrada za JU OŠ „Zaim Kolar“ na manifestaciji „Galerija volonterizma“

Na završnoj manifestaciji projekta „Volontiranje je cool“ pod nazivom „Galerija volonterizma“ održanoj 05.12.2017. godine u Sarajevu u Hotelu Hills, koju organizuje Centar za razvoj omladinskog aktivizma CROA, osnovna škola „Zaim Kolar“ osvojila je nagradu. Na manifestaciji je učestvovalo više od 300 volontera koji su predstavljali svoju volontersku grupu, a dolaze iz 45 osnovnih škola; škola iz Bijeljine, Foče, Foča-Ustikolina (FBiH), Goražda, Gruda, Ilidže, Ilijaša, Istočne Ilidže, Istočnog Novog Sarajeva, Konjica, Ljubuškog, Čitluka, Mostara, Posušja, Sarajeva, Širokog Brijega, Stoca, Trnova FBiH, Trnova RS i Vogošće.

U proteklim mjesecima jednom sedmično realizirale su se volonterske aktivnosti po vlastitom izboru s ciljem rješavanja problema lokalnih zajednica. Galerijom volonterizma obilježen je Međunarodni dan volontera.

Na manifestaciji „Galerija volonterizma“ odazvali su se predstavnici United Nations Volunteers (UNV), predstavnici Misije OSCE-a u Bosni i Hercegovini kao i mnogi drugi sponzori i prijatelji projekta. Na Galeriji volonterizma učenici naše osnovne škole su prezentirali portfolio sa urađene tri volonterske aktivnosti (podizanje ekološke svijesti, volontiranje u Crvenom Križu, te učešće i organizacija humanitarnih akcija).

Obezbijedeno je 6 nagrada za 6 kantona/regija. Učenici volonteri su dobili glasačke listiće i sami glasali, te svoj glas dali za školu tj. volontersku grupu za koju misle da je imala najbolje volonterske aktivnosti, s time da glas za najbolju aktivnost nije bilo moguće dodijeliti vlastitoj školi.

Najveći broj glasova imala je Osnovna škola „Sveti Sava“ Trnovo RS koji su nagrađeni sa vaučerom od 1600 KM od OSC-ea, a nagrada za JU OŠ „Zaim Kolar“ na manifestaciji „Galerija volonterizma“ je bila vaučer za multimedijalni uređaj u vrijednosti od 800 KM.

Učenici OŠ "Zaim Kolar" posjetili Istanbul

U okviru projekta "Moj izbor je turski jezik" direktor naše osnovne škole "Zaim Kolar" iz Dejčića zajedno sa pedagogicom škole, četiri nastavnika i četiri učenika posjetili su prijateljsku/bratsku školu "Halil Turkkhan Ortaokulu" u Istanbulu. Nastavnici i učenici boravili su u Istanbulu pet dana u razdoblju od 21. do 25. decembra 2017. godine, cilj posjete je međusobno bolje se upoznati, te upoznati dosta slične a opet različite kulture. U toku ove posjete stvorena su nova prijateljstva između učenika ovih dviju zemalja.

Učenici iz Trnova posjetili su brojne znamenitosti u Istanbulu kao što su muzej Panorama 1453, Miniaturk džamija, šetali se obalom na Uskudaru, krstarili Bosforom te su tako imali priliku naučiti nešto više o historiji Istanbula i znamenitostima iz osmanskog razdoblja.



Potpisan sporazum sa Ministarstvom za obrazovanje, nauku i mlade KS

Općinski načelnik je sa ministrom za obrazovanje, nauku i mlade Kantona Sarajevo prof.dr. Elvirom Kazazovićem potpisao Sporazum o namjenskom korištenju sredstava iz Budžeta Kantona Sarajevo. Sredstva su izdvojena za Projekat škole skijanja za učenike šestih razreda osnovne škole sa područja Općine Trnovo, tačnije nabavku opreme koju će Općina nakon realizacije procedure za nabavku opreme ustupiti osnovnoj školi. Općina, također, samostalno realizuje brojne projekte iz ove oblasti, kao što su stipendiranje redovnih studenata i učenika srednjih škola, organizacije različitih aktivnosti i takmičenja za učenike, dodjela ruksaka sa školskim priborom za učenike, osiguravanja besplatnog prevoza djece i dr.

Provedena još jedna akcija dobrovoljnog darivanja krvi

U novembru mjesecu 2017. godine, u prostorima naše Osnovne škole "Zaim Kolar" Dejčići održana druga akcija dobrovoljnog darivanja krvi u organizaciji Crvenog križa Trnovo. Akcija popularnog naziva "Daruj krv, spasi život" ističe činjenicu da je potreba za krvi kontinuirana pa je važan stalni odaziv građana na organizirane akcije darivanja krvi, kako bi se osigurala dovoljne količine doza krvi potrebnih za normalan i redovan rad zdravstvenih ustanova.

Dobrovoljnom darivanju krvi odazivali su se nastavnici škole i radnici JKP Trnovo, čije je sjedište u blizini škole. Učenici viših razreda su prisustvovali i vidjeli kako se određuje krvna grupa, a neki od njih su i donirali krv.

Ifeta Krupalija, sekretar CK Trnovo u ime organizatora zahvaljuje svim današnjim darovateljima krvi, ali i onima koji su pokušali dati krv. Njihov osjećaj i darivanje za druge je primjer pravog odnosa prema drugima. Budimo humani!



"Upozoravanje na mine"

U osnovnoj školi "Zaim Kolar" Dejčići 14.11.2017.godine održano je školsko takmičenje iz programa "Upozoravanje na mine". Na takmičenju su učestvovali tri ekipe pod nazivima Kruška, Jabuka i Dunja. Pobjednička ekipa je Dunja, tačnije učenici 7 razreda ove osnovne škole: Muhamed Mulaosmanović, Arijana Bjelica i Nedim Terzo, koji će kao pobjednička ekipa u školskom takmičenju uzeti učešće na Kantonalnom takmičenju 25-og ovog mjeseca. Crveni križ općine Trnovo koji je organizator ovog takmičenja obezbijedio je simbolične nagrade za sve učenike koji su učestvovali.

Takmičenje je manifestacija koja ima za cilj provjeru osposobljenosti učenika osnovnih škola iz programa "Upozoravanje na mine" i zaštiti od mina.



Održano Kantonalno takmičenje u okviru programa "Upozoravanje na mine"

Dana 19.11.2016. godine je u osnovnoj školi "Čengić Vila I" u Sarajevu, održano je Kantonalno takmičenje ekipa osnovnih škola u okviru programa "Upozoravanje na opasnost od mina", čiji je organizator Crveni križ Kantona Sarajevo. Suorganizator ovog takmičenja bilo je Ministarstvo za obrazovanje, nauku i mlade Kantona Sarajevo- Prosvjetno-pedagoški zavod KS.

Nakon uspješno realizovanih općinskih takmičenja, učešće na Kantonalnom takmičenju uzelo je 8 tročlanih ekipa učenika VII razreda, učenici naše osnovne škole "Zaim Kolar" Dejčići: Muhamed Mulaosmanović, Arijana Bjelica i Nedim Terzo zauzeli su četvrto mjesto.

Svi takmičari dobili su diplome za učešće na takmičenju, poklon-sveske Norveške narodne pomoći u BiH i olovke.



Briga za sve kategorije stanovnika općine

Općina značajna sredstva izdvaja za infratraktorne projekte, saobraćajnice, ali svakako i za poboljšanje kvalitete života starijih i oboljelih osoba, u školovanje osnovaca, stipendiranje srednjoškolaca i redovnih studenata, te poboljšanje životnog standarda na općini.

Sredstva za kupovinu školskih knjiga

Na osnovu zaprimljenih zahtjeva po raspisanom javnom pozivu Općine Trnovo za dodjelu novčanih sredstava za kupovinu školskih knjiga, pribora i sveski od 22. avgusta 2017. godine, 15 porodica u zavisnosti od stanja socijalne potrebe i od broja djece koja se školuju je ostvarilo pravo na novčanu pomoć u iznosu od 150, 00 – 300,00 KM. Sredstva su izdvojena iz Budžeta Općine Trnovo, fond- ostali grantovi pojedincima – opremanje školaraca.



Prevoz đaka

Ministarstvo obrazovanja KS i ove godine je obezbijedilo potrebna sredstva za prevoz učenika u škole. Zbog specifičnosti teritorije Trnova gradski javni prevoz nije u mogućnosti da obezbijedi adekvatan prevoz đacima do škole. Sredstva za ovu namjenu se obezbjeđuju za 63 učenika osnovne škole Zaim Kolar koji dolaze iz svih sela općine Trnovo. Prevoz se vrši po istom principu i za srednjoškolce koji žive na ovim prostorima, dakle privatnim vozilima, a sredstva utrošena u ove namjene refundira Ministarstvo obrazovanja KS.

Socijalna potreba

Općina Trnovo, Služba za opću upravu, društvene djelatnosti, boračko-invalidsku, dječiju i socijalnu zaštitu Budžetom za 2017. godinu planirala je i utrošila sredstva za žene preko 55 godina života u stanju socijalne potrebe i da nisu zasnivale bračnu zajednicu. Ukupno 23 žene koje imaju prebivalište na području Općine Trnovo su ostvarile pravo po ovom osnovu na novčanu pomoć.



Pomoć osobama oboljelim od teške bolesti

Općina Trnovo svojim aktivnostima djeluje i u cilju pružanja pomoći osobama oboljelim od teške bolesti, karcinoma. Znamo kako osobe oboljele od ove bolesti nailaze na velike prepreke, okružene su barijerama koje im otežavaju život stoga im je potrebna podrška, Općina Trnovo svakom oboljelim stanovniku od teške bolesti pruža simboličnu novčanu pomoć za liječenje u iznosu od 500,00 KM. Da bi ste ostvarili ovu novčanu pomoć jednokratno u toku Budžetske godine potrebno je dostaviti dokaz u vidu lječničkog nalaza i ispunjen zahtjev za jednokratnu pomoć. Zahtjev možete preuzeti na šalter-sali Općine. Općinski načelnik, Ibro Berilo: «Najveći problem na koji nailaze oboljeli građani su skupi lijekovi i terapije, iz tog razloga čini me sretnim da barem ovom simboličnom novčanom pomoći možemo oboljelim i njihovim obiteljima pružiti podršku tokom liječenja».

Podjela božićnica

Općinski načelnik dodijelio je jednokratna novčana sredstva- božićnice za 34 pravoslavne porodice sa područja Trnova u iznosu od po 100, 00 KM u povodu Božića i poželio zdravlje i prosperitet, te naglasio da je raznolikost kultura i tradicija naše općine bogatstvo koje trebamo njegovati, a praznici su jedinstvena prilika za obnavljanje veza i zajedništva.

“Svim vjernicima pravoslavne vjeroispovijesti upućujemo najiskrenije čestitke u povodu nastupajućeg praznika, sa željom da ga provedete u miru, ljubavi i zdravlju, okruženi članovima svoje porodice, prijateljima i komšijama”.

Žene - Općinsko vijeće Trnovo

Ravnopravno učešće žena i muškaraca u političkom i javnom životu je jedan od uslova demokratije. Međutim, žene su i dalje upadljiva manjina u političkom i javnom životu u našoj zemlji. Domaćim i međunarodnim normativno-pravnim standardima za ravnopravnost spolova propisan je minimum od 40 posto učešća manje zastupljenog pola (žena) u političkom i javnom životu, u upravljanju i odlučivanju. Ovaj standard, prema postojećim podacima i analizama, nije ispunjen.



I pored obavezujućeg domaćeg i međunarodnog pravnog standarda zastupljenosti ženskog pola u političkom i javnom životu, činjenično stanje je drugačije, jer vladajuće društvene norme, stereotipi i predrasude i dalje otežavaju ravnopravno učešće žena u javnom i političkom životu. Potrebno je stvoriti i političku volju, kulturno i društveno okruženje i uslove da se on može adekvatno ispuniti.

BiH na 69. mjestu po zastupljenosti žena u politici

Prema istraživanju Međuparlamentarne unije (IPU), kojim je utvrđen procenat političke participacije žena u državnim parlamentima, BiH se nalazi na 69. mjestu od ukupno 189 zemalja obuhvaćenih istraživanjem.

Agencija za ravnopravnost spolova BiH u zadnjih deset godina kontinuirano prati zastupljenost i uticaj žena u politici. Pored toga analiziraju se i faktori koji utiču na položaj žena u politici. I pored činjenice da većina parlamentarnih stranaka u Parlamentarnoj skupštini ima preko 50 posto žena u svom članstvu, relativno visok

procenat žena u stranačkim tijelima odlučivanja (oko 30 posto), žene su i dalje manje zastupljeni spol na izbornim listama dok se broj izabranih žena kreće oko 20 posto.

U Općinskom vijeću Trnovo od 15 općinskih vijećnika četiri su žene, predsjedavajući općinskog vijeća je žena, kao i njen zamjenik, što je jedini slučaj u Kantonu Sarajevo. Sve ovo dokazuje da žene svojim većim aktiviranjem i djelovanjem mijenjaju svijest o značaju učešća žena na mjestima odlučivanja.

"Veće učešće žena u politici donosi ne samo novi aspekt i novi kvalitet u odlučivanje i upravljanje, već vodi ka efikasnijem, funkcionalnijem i organizovanijem društvenom poretku zasigurno." predsjedavajuća Općinskog vijeća Trnovo, gospođica Emina Mehmedagić.

Rodna ravnopravnost u oblasti političkog i javnog života, je tema na kojoj se kontinuirano mora raditi. Institucionalni mehanizmi za rodnu ravnopravnost (Agencija za ravnopravnost spolova BiH, Gender centar Vlade FBiH i Gender centar Vlade RS) kao i opštinske komisije za ravnopravnost spolova na lokalnom nivou vlasti, te nevladin sektor i mediji raznim aktivnostima kontinuirano rade na podizanju



svijesti javnosti u cilju povećanja učešća žena u oblasti političkog i javnog odlučivanja. Veoma je važno da mišljenja, problemi i interesi žena budu u potpunosti zastupljeni u donošenju odluka. Političko djelovanje žena se može postići stvaranjem institucionalnih i društvenih uslova kako bi zaista dijelile odgovornost donošenja odluka.

Za ravnopravnost treba ispuniti tri uslova: ravnopravna podjela rada, jednake šanse za napredovanje u karijeri i ravnopravna raspodjela porodičnih odgovornosti.

Zamjenica predsjedavajuće Općinskog vijeća Trnovo, Branka Kenjić: «Znamo da je obavezujući domaći i međunarodni pravni standard najmanje 40% učešća žena u političkom i javnom životu ali je to u stvarnosti drugačije jer vladajuće društvene norme, štetni stereotipi i predrasude i dalje otežavaju ravnopravno učešće žena u javnom i političkom životu. Veće učešće žena u politici donosi novi aspekt i kvalitet u odlučivanju i upravljanju. U našoj općini vodi se računa o zastupljenosti žena tako da imamo predsjednicu i zamjenicu općinskog vijeća žene kao i žene vijećnice. Problem je i u samim ženama, počev



od toga kako se organizovati i naći slobodno vrijeme za sve aktivnosti. Puno je obaveza u samoj porodici, poslovne obaveze i na kraju politički aktivizam ali uz dobro zdravlje i dobru organizaciju i volju stiže se sve jer ja kažem sebi - ja hoću, ja želim, ja moram.»

Vijećnica u Općinskom vijeću Trnovo, Arnela Katana: «Na temu žene u politici ja bih izdvojila dva citata koji savršeno odgovaraju. U politici, ako želiš da nešto bude rečeno, pitaj muškarca. Ako želiš da bude urađeno pitaj ženu. Jedna stvar koju žene moraju da nauče je da im niko neće dati moć. Sama je jednostavno uzmeš.»



Matične knjige Općine Trnovo – 2017. godina

U protekloj godini pred matičarem Općine Trnovo sklopljeno je 14 brakova.

Građanski brak, zakonom uređena životna zajednica žene i muškarca sklapa se saglasnom izjavom pred matičarem. U Općini Trnovo u protekloj godini je 14 parova izreklo svoje sudbonosno „Da“.

Sklapanje braka je jednostavan proces u Općini Trnovo, uz potrebnu, zakonom propisanu dokumentaciju vjenčanje u Općini, i na njenom cjelokupnom teritoriju je dostupno svakim danom. Svi potrebni obrasci za prijavu vjenčanja su besplatni i dostupni na šalter-sali Općine.

Prema socijalnom programu Općine, po prvi put, dakle Budžetom iz 2017. godine dodijeljivana su sredstva za potporu novovjenčanih parova. Općina Trnovo će i u tekućoj 2018. godini novim bračnim parovima dodjeljivati jednokratnu novčanu pomoć – poklon u iznosu od 500,00 KM. Na ovaj način Općina želi pomoći mladima u zasnivanju porodice.

U 2017. godini u Općini Trnovo upisano je 19 beba u Matičnu knjigu rođenih.

Općina već tri godine obezbjeđuje dodatne naknade porodicama za svako novorođeno dijete. Naime, općina je 2015. godine donijela odluku kojom se odobrava isplata novčanih sredstava iz Budžeta Općine za novorođenu djecu u periodu od 12 mjeseci, u iznosu od 50,00 KM mjesečno a koji su upisani u Matičnu knjigu rođenih Općine Trnovo i aktivno žive na teritoriji iste.

Zakonom o matičnim knjigama koji je stupio na snagu 12. maja 2012. godine uspostavljen je Matični registar koji sadrži podatke iz svih matičnih knjiga. Registar čiji je sastavni dio i Trnovo, uspostavljen je na nivou Općina/Gradova, Kantona i Federacije BiH.

U Matičnom uredu u Općini Trnovo, građani mogu dobiti izvode iz matičnih evidencija rođenih, državljana, vjenčanih i umrlih i iz drugih općina u Federaciji BiH.



Bračni par Pozder: "Mnogo znači bilo kakva pozitivna pažnja..."



Prirodne ljepote Općine Trnovo



Prirodne ljepote Općine Trnovo